

Bonngoe ba Tumelo



SABATHA MANTSIBOEA

Bakeng sa Boithuto ba Beke Ena Bala:

Liketso 4:8-12; Liketso 1:11; Matt. 25:1-13; Ba-Heb. 9:11, 12; Exod. 20:8-11; 1 Ba-Kor. 15:51-54.

Teman'a Khopolo:

“ ‘Me ha ho poloko ho e mong; hobane ha ho lebitso le leng tlas' a leholimo, leo batho ba le neiloeng, leo re ka bolokehang ka lona ’”(Liketso 4:12).

Ka 1888 Baleti ba Letsatsi la Bosupa ba ile ba ba le boiphihlelo le puisano tse chesang ka botoloki ba litemana tse ling tsa mantlha tsa Bibe. Ha baruti le baetapele ba ntse ba buisana ka se tšoantšoang ke manaka a leshome a boporofeta ba Daniele 7 le molao o ho Ba-Galata 3:24, ke ba fokolang feela ba ileng ba elleloa kamoo bora boo ba neng ba e-na le bona e mong ho e mong bo neng bo senya kopano ea boena le setsoalle sa bona ka teng 'me ka mokhoa o joalo, bo neng bo senya bonngoe le thomo ea kereke. Ellen G. White o ile a khalemela boemo bona ba litaba ka matla a maholo 'me a khotlaetsa bohle ba leng teng lipuisanong tsena ho nahana ka thata ka kamano ea bona le Jesu le kamoo lerato la Jesu le loketseng ho bontšoa kateng boitšoarong ba rona, haholo-holo haeba re hanyetsana. A boela a re ha rea lokela ho lebella hore e mog le e mong ka kerekeng a lumellane ntlheng e 'ngoe le e 'ngoe ea botoloki ba litemana tsa Bibe. Empa a boela a tiisa hore re lokela ho batla kutloisiso e tšoanang ha ho tluoa lintlheng tsa bohlokoa tsa tumelo ea Baleti (sheba Ellen G. White, Counsels to Writers and Editors, maq. 28-32). Bekeng ena re tla talima tse ling tsa lithuto tsa Bibe tsa bohlokoa tse re etsang Baleti le tse bopang bonngoe ba rona tumelong.

**Ihute thuto ea beke ena ho lokisetsa Sabatha sa la 24 Pulungoana.*

Poloko ho Jesu

Leha rona re le Baleti ba Letsatsi la Bosupa re na le lintho tse ngata tse tšoanang le tsa liphutheho tse ling tsa Bokreste, lintlha tsa tumelo ea rona li etsa tlhophiseho e ikhethileng ea 'nete ea Biblele eo ho seng e mong ea e bolelang lefatšeng la Bokreste. Linnete tsena li re thusa ho itlhalosa re le Masala a Molimo a mehla ea bofelo.

Bala Liketso 4:8-12, 10:43. Ke bohlokoa bofe boo Petrose a bo neang sebaka sa Jesu Kreste kutloisisong ea hae ea leano la poloko?

Moapostola Pauluse o ile a bolella ba-Korinthe hore litaba tse molemo ke hore “Molimo o no o le ho Kreste, ha o busetsa lefatše khotsong ho oona” (2 Ba-Kor. 5:19). Lefu la Kreste ke poelano ea rona le Ntate, ka ho koala lekhalo le siiloeng ke sebe le lefu. Ka mengoahakholo, haesale Bakreste ba ntse ba ipotsa ka se boleloang ke lefu la Kreste, tsoho, le poelano eo a tlleng ho e phetha. Tšebetso ena ea poelano e fuoe lebitso la lipheko [atonement], lentsoe la khale la Senyesemane leo qalong le neng le bolela ho ba bang “at-one-ment.” Boemo bona ke ba ho ba “bang,” kapa tumellanong. Ka tšoanelo, lipheko li supa kutloano kamanong, 'me ha ho bile le bora, kutloano ena e tlišoa ke poelano. Bonngoe ba kereke ka mokhoa o joalo ke neo ea poelano.

Litemana tse latelang li re ruta eng ka se boleloang ke lefu la Jesu le tsoho ea Hae?

Ba-Roma 3:24, 25 _____

1 Johanne 2:2 _____

1 Johanne 4:9, 10 _____

1 Pet. 2:21-24 _____

Leha re lumela ho shoa le ho tsoha ha Jesu ka tsela e tšoanang le liphutheho tse ngata tsa Bokreste, re e phatlalatsa moeelong oa “evangeli ea kamehla le mehla” (Tšen. 14:6), karolo ea molaetsa oa manyeloi a mararo oa Tšenolo 14:6-12. Re le Baleti ba Letsatsi la Bosupa, re phatlalatsa melaetsa ena ka matla a fetang liphutheho tse ling tsa Bokreste.

Ke joang u ka lulang u beile kapele ho uena bonnete ba lefu la Kreste le tsoho ea Hae le tšepo e tlišoang ke tsona?

Ho Tla ha Bobeli ha Kreste

Baapostola le Bakreste ba pele ba ne ba nka ho khutla ha Kreste e le “tšepo e lehlohonolo” (Tite 2:13), ’me ba ne ba lebelletse hore boporofeta le litšepiso tsohle tsa Bibe le tla phethahatsoa ho Tleng ha Bobeli. Baleti ba Letsatsi la Bosupa ba ntse ba tšoareletse kholisehong ena ka matla. Hantle-ntle, lebitso la rona, “Baleti,” le e bolela ka ho topa. Bohle ba ratang Kreste ba shebile pele ka tebelo ea hore ka letsatsi le leng ba tla kopana le Eena lifahleho li talimane. Ho fihlela letsatsing leo, tšepiso ea ho khutla ha bobeli ha Kreste ho ba le tšusumetso e tlisang bonngoe holim’a batho ba Molimo.

Litemana tse latelang li re ruta eng ka tsela eo Kreste a tla khutla ka eona? Ho fapana joang le ka tsela eo ho tumisitsoeng ho khutla ha Kreste ho tla ba kateng? Liketso 1:11; Matt. 24:26, 27; Tšen. 1:7; 1 Ba-Thes. 4:13-18; Tšen. 19:11-16.

Khafetsa Bibe le pheta ho re tiisetse hore Jesu o tla feela a boee ho tla nka batho ba Hae bao a ba lopollotseng. Hore na ketsahalo ena e etsahala neng ha ho ea lokela ho ba taba eo re itubang ka ho e hakanya hobane Jesu ka sebele o boletse hore, “ ‘Ha e le letsatsi leo le hora eo, ha ho ea tsebang; esita le manyeloi a leholimo ha a tsebe, leha e le Mora; empa ho tseba Ntate a ’notši’ ” (Matt. 24:36). Ha se feela hore ha re tsebe na Kreste o tla neng hape, ehlile re bolelletsoe hore ha re tsebe. Pheletsong ea bosebeletsi ba Hae, Jesu o ile a pheta setšoantšo sa baroetsana ba leshome (Matt. 25:1-13) ho hlalosa boiphihlelo ba kereke ha e ntse e emetse ho tla ha hae ha bobeli. Lihlopha tse peli tsa baroetsana li tšoantša lihlopha tse peli tsa balumeli ba bolelang hore ba emetse Jesu. Ha ho okoloa kaholimo feela ekare lihlopha tse peli tsena lia tšoana; empa ha ho e-ba le tieo ea ho khutla ha Jesu, phapano ea ’nete e teng lipakeng tsa bona ea totobala. Sehlopha se seng, ho sa natse tieho, se ne se ntse se bolokile tšepo e ntse e phela ’me se entse boitokiso ba semoea bo lekaneng. Ka setšoantšo sena Jesu o n’a batla ho ruta barutuoa ba Hae hore boiphihlelo ba Bokreste ha bo ea lokela ho tšetlehoa chachehisong ea maikutlo feela kapa cheseho empa boitšetlehong bo tsoelang pele holim’a mohau oa Molimo le ho tiisetse tumelong leha ho se na bopaki bo tšoarehang ba phethahatso ea litšepiso tsa Molimo. Jesu o ntse a re mema le kajeno hore re “falimehe” ’me re lokele ho tla ha Hae ka linako tsohle.

Leha lebitso la rona ka bo lona “Baleti ba Letsatsi la Bosupa” le pakahatsa kamoo ho Tla ha Bobeli ho leng bohlokoa ho rona kateng, ke joang ka bo-mong ba rona re ka bolokang ho Tla ha Bobeli ka likelellong tsa rona? Ke joang, ekareng ha lilemo li ntse li tsoela pele, re ke keng ra etsa phoso eo Jesu a hlokomelisitseng ka eona setšoantšong sa baroetsana ba leshome?

Bosebeletsi ba Jesu ka Sehalelong sa Leholimo

Testamenteng ea Khale, Molimo o ile a laela Moshe ho aha tabernakele, kapa sehalelo, se tlang ho sebetsa e le “bolulo” ba Hae lefatšeng (Exod. 25:8). Ka litšebeliso tsa sona, sehalelo e ne e le sebaka seo ho sona sechaba sa Israele se neng se ruta leano la pholoho. Hamorao, nakong ea morena Salomone, tabernakele e nyenyane eo e ile ea nkeloa sebaka ke tempele e tsothang ka botle (1 Marena 5-8). Tabernakele le tempele ka bobeli li ne li entsoe ka moralo oa sehalelo sa leholimo, “tabernakele ea sebele e hlomiloeng ke Morena, e seng ke motho” (Ba-Heb. 8:2; sheba le Exod. 25:9, 40). Hohle kahare ho Bibe, ho akanyoa hore ho na le sehalelo leholimong se sebetsang e le sona sebaka sa Molimo sa mantlha sa bolulo. Litšebeliso tsa sehalelo le lefatšeng e ne e le “boporofeta bo bonyane” ba leano la pholoho le ba besebeletsi ba Jesu ba boprista leholimong.

Bala Ba-Heberu 8:6; 9:11, 12, 23-28; le 1 Johanne 1:9-2:2. Litemana tsee li re ruta eng ka besebeletsi ba bo prista ba Jesu leholimong?

Ho tloha ka nyolohelo ea Hae, sehalelong ke hona sebakeng seo Jesu a etsatsang besebeletsi ba hae bakeng sa pholoho ea rona (sheba Ba-Heb. 7:25). Kahona, re khothalletsoa hore re “atameleng ka tšepo terone ea mohau, hore re tle re bone mohau, ‘me re fumane lereko, re tle re thusoe nakong e lokelang” (Ba-Heb. 4:16). Joaloka ha tabernakele ea lefatšeng e ne e-na le mekhahlelo e ‘meli ea besebeletsi ba boprista—oa pele, oa letsatsi le letsatsi ka Sehalelong, ‘me hang ka selemo ka Sehalelisisong—Bibe e boitse e hlalosa mekhahlelo ena e ‘meli ea besebeletsi ba boprista ba Jesu leholimong. Bosebeletsi ba Hae ka Sehalelong sa leholimo tšobotsi ea bona e ne e le bobuelli, tšoarelo, le poelano. Baetsalibe ba bakang ba tseba ho atamela ho Ntate ka kotloloho ka Jesu e le Moemeli (1 Johanne 2:1). Ho tloha ka 1844, besebeletsi ba Jesu ka Sehalelisisong bo sebetsana le lintlha tsa kahlolo le tlhoekiso tse neng li etsoa hang ka selemo ka Letsatsi la Lipheko (Levitike 16). Bosebeletsi ba tlhoekiso ea sehalelo le bona bo itšetlehile holim’a mali a Jesu a tšolohileng. Tefelo e neng e etsoa letsatsing leo e ne e tšoantšha tšebeliso ea makhabane a Jesu ho tlosa boteng ba sebe le ho fihlela poelano e felletseng ea maholimo le mafatše ho ’muso o le mong o nang le kutloano tlas’a Molimo. Thuto ea besebeletsi bona bo mekhahlelo e ‘meli ke tlatsetso ea Baleti e ikhethileng tabeng ea kutloisiso ea leano lohle la pholoho.

Sabatha

Thuto e 'ngoe ea bohlokoa eo Baleti ba Letsatsi la Bosupa ba e lumelang le ho e tsoarela holimo ke ea Sabatha ea letsatsi la bosupa. Ke thuto ea mantlha e tlisang bonngoe le kopano ea boena har'a rona. Ke eo, kante ho ba 'maloa kahare ho Bokreste re e latelang re le bang. Sabatha ke mpho ea Molimo ho batho hantle ho tloha bekeng ea Tlhohlehong ka bo-eona (Gen. 2:1-3). Tlhohlehong, Sabatha e theiloe ka lintlha tse tharo tse ikhethollang hape tse halalelang: (1) Molimo o ile oa phomola ka Sabatha, (2) O ile oa hlohonolofatsa letsatsi leo, 'me (3) Oa le halaletsa. Liketso tsena tse tharo li theile Sabatha e le mpho e khethehileng ea Molimo, e thusang leloko la botho ho ba leboiphihlelo ba leholimo lefatšeng le ho tiisa Tlhohleho ea Molimo ea matsatsi a tšeletseng. Rabi ea tsejoang haholo, Abrahamama Joshua Heschel, o bitsitse Sabatha “nako ea ntlo ea borena,” letsatsi le halalelang leo ka lona Molimo o kopanang le batho ba oona ka tsela e khethehileng.

Litemana tse latelang li re ruta eng ka seo Sabatha e se bolelang ho motho? Exod. 20:8-11; Deut. 5:12-15; Ezek. 20:12, 20.

Takatsong ea rona ea ho latela mohlala oa Jesu (Luka 4:16), Baleti ba Letsatsi la Bosupa ba boloka Sabatha ea letsatsi la bosupa. Taba ea Jesu ea ho nka karolo litšebelatsong tsa Sabatha e senola hore o ile a e chaela monoana e le letsatsi la phomolo le la khumamelo. E meng ea mehlolo ea Hae e ile ea etsoa ka Sabatha e le ho ruta lehlakore la pholiso (ea nama le ea moea ka bobeli) e tlišoang ke ho keteka Sabatha (sheba Luka 13:10-17). Baapostola le Bakreste ba pele ba ne ba utloisisa hore Jesu ha a felisa Sabatha; le bona ka sebele sa bona ba ile ba e boloka le hona ho ea khumamelong ka letsatsi leo (Liketso 13:14, 42, 44; 16:13; 17:2; 18:4). Lehlakore le leng le letle la taba ea Sabatha ke ea hore ke letšoa la topollo ea rona sebeng. Sabatha ke sehopotso sa poloko ea Molimo ea sechaba sa Israele ho tsoa bokhobeng ba Egepeta ho ea phomolong ea Kanana lefatšeng la pallo. (Deut. 5:12-15). Leha Israele e hlolehile ho kena phomolong eo ka botlalo ka lebaka la ho hloka kutlo ha bona le borapeli ba litšoantšo ho neng ho ipheta, Molimo o ntse a tšepisa hore “phomolo e teng e saletseng sechaba sa Molimo” (Ba-Heb. 4:9). Bohle ba lakatsang ho kena phomolong eo ba ka kena ho eona ka tumelo pholohong eo Jesu a re neang eona. Poloko ea Sabatha e tšoantša phomolo ena ea semoea ho Krete le hore re itšethile makhabaneng a Hae, 'me e seng mesebetsing, bakeng sa ho re boloka le ho re nea bophelo bo sa feleng. (Sheba Ba-Heb. 4:10, Matt. 11:28-30.)

Ke ka litsela life tse tšoarehang tseo ka tsona Sabatha e u thusitseng ho ba le boiphihlelo ba bonngoe le kopano ea boena tseo Jesu a lakatsang hore batho ba Hae ba be le tsona?

Lefu le Tsoho

Tlhohong, “Molimo a bopa motho ka lerole la lefatše, ’me a bululela linkong tsa hae phefumoloho ea ho phela, ’me motho ea e-ba moea o phelang” (Gen. 2:7). Tlaleho ena ea popo ea motho e senola hore bophelo bo tsoa ho Molimo. Na ho se shoe ke karolo e tsamaellanang le bophelo boo? Bibe e re bolella hore ke Molimo feela ea sa shoeng (1 Tim. 6:16); ho se shoe ha ho neoe batho tsoalong. Ho fapana le Molimo, batho bona ba ea shoa. Lengolo le bapisa bophelo ba rona le “moholi feela o bonahalang ka motsotso o se mokae, o ntoe nyamela” (Jakobo 4:14), ’me lefung maphelo a rona a kena boemong bo tsoanang le ba boroko moo teng ho seng tsebo ea letho. (Sheba Moek. 9:5, 6, 10; Ps. 146:4; Ps. 115:17; Johanne 11:11-15.) Leha batho ba tsoaloe ba e-na le ho shoa ’me ba le tlas’a lefu, Bibe e bua ka Jesu e le Eena mohloli oa ho se shoe ’me e re bolella hore o fana ka tšepiso ea bophelo bo sa feleng ho ba lumelang polokong ea Hae. “Neo ea mohau ea Molimo ke bophelo bo sa feleng, ka Jesu Krete, Morena oa rona” (Ba-Roma 6:23). Jesu o “felisitse lefu, a bea bophelo le ho se shoe leseling ka Evangeli” (2 Tim. 1:10). “Hobane Molimo o ratile lefatše hakalo, o bile oa le nea Mora oa oona ea tsoetsoeng a ’notši; hore e mong le e mong ea lumelang ho eena, a se ke a timela, a mpe a be le bophelo bo sa feleng” (Johanne 3:16). Kahona, ho na le tšepo ea bophelo kamor’a lefu.

Bala 1 Ba-Korinthe 15:51-54 le 1 Ba-Thesalonika 4:13-18. Litimana tsee li re bolella eng ka bophelo kamor’a lefu le hore na batho ba tla neoa ho se shoe neng?

Moapostola Pauluse oa hlakisa hore Molimo o nea batho ho se shoe, ’me e seng nakong ea ho shoa ha bona, empa ka nako ea tsoho, ha terompeta ea morao e lla. Ha balumeli ba amohela tšepiso ea bophelo bo sa feleng nakong eo ba amohelang Jesu e le Mopholosi oa bona, ho se shoe hona ho fanoa nakong ea tsoho. Testamente e Ncha ha e tsebe letho ka taba ea batho bao meea ea bona e nyolohelang leholimong hang ha ba e-shoa; motso oa thuto ena o bohedeneng, o tsoa morao koana mehopolong ea Ma-Gerike a khale, ’me ha e fumanehe Testamenteng ea Khale kapa e Ncha.

Kutloisiso ea rona ea lefu e re thusa joang ho utloisisa tšepiso ea ho Tla ha Bobeli le ho feta? Tumelo ee e re kopanya joang ka matla a maholo re le Baleti ba Letsatsi la Bosupa?

Ho Ithuta Haholoanyane:

Ellen G. White, “The Foundations, Pillars, and Landmarks,” maq. 28-32, ho *Counsels to Writers and Editors*. Bala phatlalatsa ena “Doctrines, Importance of,” maq. 778, 779, ho *The Ellen G. White Encyclopedia*. Re le Baleti ba Bolokang Letsatsi la Bosupa re na le lintlha tsa tumelo tseo re tsoanang ka tsona le liphutheho tse ling tsa Bakreste. E khubung, ka ho hlaka, ke ho lumela taba ea pholoho ka tumelo feela ka lefu la Jesu le lefelang le ho re nkela sebaka. Rona hammoho le Bakreste ba bang, re lumela hore ho loka ha rona ha ho fumanoe ka mesebetsi ea rona empa ka ho loka ha Kreste, hoo re ho neoang ka tumelo, neo ea mohau e sa re lokelang. Kapa joaloka ha Ellen G. White a ngotse polelong e tloaelehileng: “Kreste o ile a tsoaroa ka tsela e re lokelang, e le hore re tle re tsoaroe ka tsela e loketseng Eena. O ile a ahloloa ka lebaka la libe tsa rona, tseo a neng a se na kabelo ho tsona. O ile a shoa lefu leo e neng e le la rona, e le hore re tle re amohele bophelo boo e neng e le ba Hae.”—*The Desire of Ages*, leq. 25. Ho ntse ho le joalo, lethathamo la litšiea tsa rona tsa tumelo, le re etsa hore re ikhethe kahar’a lefatše la Bakreste. E feela ho lokela ho ba joalo; ha ho se joalo, ke haeba re le lerato la rona ho Jesu, le thuto eo re e phatlalatsang, li lokela ho ba lintlha tse matla ka ho fetisisa bakeng sa ho re kopanya.

Lipotso tsa Puisano:

1. Ho [Tumelo le Mesebetsi] Faith and Works, leq. 103, Ellen G. White o lekanya tokafatso le tsoarelo ea libe. Kutloisiso ea tsoarelo le tokafatso ea rona ho Kreste e ka ba motheo oa kopano ea rona ea boena le ho phelisana hammoho le baena le likhahitseli joang?
2. Nahana kamoo lithuto tsa rona li leng bohlokoa kateng moeelong oa bonngoe ba kereke. Ke hore, ke eng e bokelletseng hammoho li-milione tsa batho tse tsoang merabeng, borapeling, lipolotiking, le meetlong e fapaneng ha e se lithuto tseo re li lumelang hammoho? Taba ee e re bolella eng ka bohlokoa ba thuto, e seng feela moeelong oa thomo le molaetsa empa le bakeng sa bonngoe ba kereke?
3. Lebitso la rona “Baleti ba Letsatsi la Bosupa” le supa lithuto tse peli tsa bohlokoahali, Sabatha ea letsatsi la bosupa le ho Tla ha Bobeli. Karolo e ’ngoe ea lebitso la rona e supa ho Tlholeho, ha e ’ngoe e supa ho topollo. Lithuto tse peli tsee li amana joang, ’me ke ka litsela life hammoho ka tsela e hlakileng li phuthetseng moelelo oa seo re leng sona re le batho?

Kakaretso: Baleti ba Letsatsi la Bosupa ba lumela litšiea tse ngata tsa tumelo tse tsoanang. Tse ling li tsoana le tsa Bakreste ba bang; tse ling ha li tsoane. Lithuto tsena ha li nkuoa hammoho li etsa boleng bo ikhethang ba kereke ’me ke motheo oa bonngoe ba rona ho Jesu.